

**Date – 18/11/2024**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Sinlung Hills Council inthlanna a member 12 thlan tlinte chu vawiin hian Aizawl Bawrhsap Pisa Pui Hall-ah thutiamtira lakluh an ni dawn.**
- 2. Chief Information Commissioner, Central Information Commission Heeralal Samariya chuan ni hnih cham turin Mizoram a rawn tlawh.**
- 3. Prime Minister Narendra Modia leh Nigerian President Bola Ahmed Tinubu te chu nimin khan Abuja-a Presidential Villa-ah an inkawm a.**
- 4. Union Home Minister Amit Shah chuan nimin khan Manipur dinhmun ngaihtuahin senior official te a thutkhawmpui.**

<><><>

**SHC OATH TAKING**

**Tun hnai Sinlung Hills Council inthlanna a member 12 thlan tlinte chu vawiin hian thutiamtira lakluh an ni dawn.**

**Aizawl district bawrhsap thuchhuahin a sawi danin Sinlung Hills Council inthlanna a thlan tlinte hi Aizawl Bawrhsap Pisa Pui Hall-ah vawiin chawhma dar 11-ah thutiam tira lakluh tura ruahman a ni a. Protem chairman atana thlanin thu hi a tiamtir ang. Thu dawn danin hemi zawhah hian Sinlung Hills Council chairman tur hi thlan a ni ang a. Chumi zawhah chuan MNF leh a thawhpui HPC ® atanga thlan tlin mi 7-te chuan sorkarna an siam theih thu chairman hnenah hriattirin an nihna tura lo ruahman lawk angin an inrawt zel ang a. Chief Executive Member (CEM) leh Executive Member (EM) te pawh thutiam tira lakluh nghal turin ruahmanna an siam niin MNF party hruaitute chuan an sawi a ni.**

**Tun thla ni 5-a Sinlung Hills Council inthlanna-ah khan MNF-in bial 5 an la a, an thawhpui HPC (Reformed)-in bial 2 la-in sorkarna an siam thei a. ZPM in bial 4 la-in Congress in bial 1 an la a ni.**

**Thu dawn danin MNF member Vanbawng bial atanga thlan tlin Pu Ricky Lalremsanga chu CEM a ni dawn a. EM turte a ruat leh dawn a ni.**

<><><>

**MSPMC**

**Kumin January ni 22 a din Mizoram State Project Monitoring Committee (MSPMC) chuan tun hnai thleng khan hnathawh mek 31 zingah hna tha thawh tha lo engemawzat a hmuchhuak.**

MSPMC-in hna hrang hrang a endik tawh 31 zingah hian central sorkar project 22, cheng vaibelchhe 419 leh nuai 7 hu, state sorkar hnuai a thawh project 5, cheng vaibelchhe 65 leh nuai 32 hu bakah hna 4, cheng vaibelchhe 735 leh nuai 81 hu chu central leh state sum hmanga project thawhte a ni a. Hna 31 thawhna atana sum ruahman hi a vai chuan cheng vaibelchhe 1,220 leh nuai 20 a ni. MSPMC-in an endik tawh zinga Project thenkhat, hna tha lo leh a nih tur ang pha lo te chu siam that tir mai bakah Department a endikna a mawhphurtute chung a dan anga action la tura thurawn pek te pawh a awm bawk niin tun hnai a MSPMC hmalakna tlangpui thlirletna tihchhuahah tarlan a ni a. Project an tlawh tam zawk hi contractor-te hian a tira zawh hun tur bituk (scheduled completion time) an pel deuh vek hlawm a. Department lam atanga vil hneh tawh loh avang te, Covid hrileng leh hmanrua chawh luhna lama harsatna avang te a ni a. Hun pek belh chhung ngeia hna fel fai taka an zawh theih na'n, Resource Based Work Program rintlak siama zawm nghal turin a vawngtu Department leh Contractor te hriattir an ni thin.

MSPMC in project an endik tawh tam ber hi Non-works Department (Project chinchang hrethiam Engineer te awm lohna) te thawh a ni a. Contractor te hnathawh endik kawngah harsatna lian tak a awm. Hna quality-in a tuar tlangpui a. Hna thenkhatah chuan a taka hna thawktute hi a hming kengtu contractor ni lovin midang hminga thawk te niin a lang bawk. Hetianga contractor ten an hna midang kuta an dah hi project hna hian a tawrh phah em em niin an sawi a ni.



CIC

Chief Information Commissioner, Central Information Commission Heeralal Samariya chuan ni hnih cham turin Mizoram a rawn tlawh a, nimin tlai khan Aizawl a rawn thleng.

Heeralal Samariya hian vawiinah Mizoram Information Commission official te kawmin, naktukah Serchhip District a tlawh anga hetah hian District chhung dept hrang hrang SPIO te a kawm bakah Village council hruaitute a kawm dawn bawk a ni.

Nimin tlai khan Chief Information Commissioner, Central Information Commission Heeralal Samariya hi State Guest House Chatlang ah Mizoram State Information Commissioner Mangjangam Touthang, Information Commission Secretary Dolianbuia ten an lo dawng sawng a ni.



RICE FOR REFUGEES

Mizorama raltlan awm mek mi 40,000 velte tanpuina atana a thlawna buhfai sem tur chu phurhluh zawh tep a ni.

Food, civil supplies & consumer affairs (FCS&CA) department hotute hnen atanga thu dawn danin sorkar laipui ruahmanna anga buhfai metric tonne 1,379 leh quintal 34 phurh luh hna chu tun kar chhung hian zawh hman beisei a ni. Food corporation of India (FCI)-in pekchhuah phalna a tihchhuah mai loh avangin buhfai phurh hna hi an tan tlai a. Chuti chung chuan phalna hmuh ve leh atangin phurh luh nghal a ni a. Tun kar hi chuan zawhfel vek tum

a ni. Buhfai hi district hmunpui thlenpui a, kudam a dah nghal zel a ni a. FCS&CA director chuan tunkar chung hi chuan phurh zawh fel vek hman an inrin thu Akashvani Aizawl a hrilh a. Hemi hnu lamah chuan home department ruahmanna-in district 11 a bawrhsap pisa hnathawkte'n a sem hna hi an buaipui zui dawn a ni.

Sorkar laipui Ministry of Home Affairs chuan Mizoram a awm mek raltlante tanpuina atan an ei tur cheng vaibelchhe nga hu a ruahman a, hei hi a thlawna sem tur a tih a ni. Supply department hotute chuan cheng vaibelchhe 5 hi buhfai leina, a phurh chhuahna leh a semna senso daih vek tura ngaih a nih thu an sawi a ni.

Tuna hriat theih hnukung berah Mizoramah Myanmar raltlan mi 33,004 an awm a, Bangladesh atanga raltlan hi mi 2,014 an awm bawk a. Manipur tharum thawhna avanga humhimna zawnga rawn tlan lut hi an kir tam leh tawh hle na-in mi 4,200 chuang ve la awm anga ngaih a ni. Manipur atanga rawn lut hi an tam lai berin mi 12,000 chuang an tling a, Myanmar raltlan pawh hi an tam lai berin mi sing li an chuang a ni. Myanmar leh Manipur atanga sahimna zawnga lo lutte hi district hrang hrangah an awm darh a. Tam tak chu an puala siam relief camp-ah awmin chhungkhat laina leh thiante rawn bel bakah mi in luah a awm an awm bawk. Bangladesh raltlante erawh chu Lawngtlai district-ah chauh an awm thung a ni.



#### ASF UPDATE

Kumina thla engemawzat chung African Swine Fever (ASF) vawk pulhri leng avanga nitin vawk thi an awm ziah hnu-ah a vawi khatna atan nimin khan vawk thi report a awm lo.

ASF hrileng avanga nitina vawk thi zat chu a hniam chhoh zel lain pun leh hluai chang a la awm leh thin a. Nimin khan vawk thi pakhatmah a awm lo niin animal husbandry & veterinary department hotute chuan an sawi a. Heti hian kumin February ni 9-a Champhai district Leithum khua a ASF vawk pulhri leng avanga vawk thi an chhinchhiah tan atang khan a vaiin vawk thi zat hi 14,699 a tling tawh a. Tun dinhmunah hian khaw 255 chu vawk pulhri lenna a puan mek a ni.

Nimin khan ASF natna vei vawk damlo 2 talh a ni a, Serchhip district a Baktawng khua ami ve ve a ni. Kar kalta Pathianni kha tun hnai a ni khata vawk damlo talh awm loh ni hmasa ber a ni a, Zirtawpni khan vawk suat awm loh ni a thleng leh bawk a. Heti hian kumin chhunga vawk pulhri a darh zel venna atana vawk damlo talh tawh zawng zawng chu 23,941 a tling tawh niin Vety department chuan an chhinchhiah a ni.



#### AIR ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.



## PM IN NIGERIA

Prime Minister Narendra Modia leh Nigerian President Bola Ahmed Tinubu te chu nimin khan Abuja-a Presidential Villa-ah an inkawm a. Hruaitu pahnih te hian India leh Nigeria thawhdunna hrang hrang sawidunin hmasawn zel dan tur an ngaihtuah a. Prime Minister an inbiakna chu a hlawk hle nia a hriat thu a sawi a ni.

Prime Minister Modia hi Nigeria chawimawina sang 'Grand Commander of the Order of the Niger' hlan a ni a.Heng bakah hian ram pahnihte hian inremna thuthlung pathum cultural exchange programme, custom Cooperation and Survey Cooperation.



## MANIPUR

Union Home Minister Amit Shah chuan nimin khan Manipur dinhmun ngaihtuahin senior official te a thutkhawmpui. Thudawn danin Pu Shaha chuan vawiin hian kimchang takin Manipur dinhmun ngaihtuaha thutkhawm a ko bawk a ni.Union Home Ministry chuan security force te chu Manipura remna leh muanna a awm theih nan a tul anga hmala tura hriattir an ni a ti a. Tunhnaiah state chhung dinhmun a ralmuang lo hle nia thudawn a ni.

Tharum thawhna thleng thin chu na taka chhanlet a nih tur thu sawiin Union Home Ministry chuan thubuai pawimawh zualte chu National Investigation Agency (NIA) ah thawn a ni tawh a ti bawk.

Nimin chawhnu atang khan Manipur Home Department chuan Jiribam leh Pherzawl district-a internet leh data service zawng zawng ni hnih chhung atan a titawp a ni.

Hetihlai hian National People's Party (NPP) chuan N,Biren Singha kaihhruai Manipur sawrkar an thlawpna an hnukdawk a. NPP hian MLA pasarih neiin BJP hi sawrkar siam turin an thlawp a. BJP hian MLA 32 an nei ve thung a ni. NPP hotupa Conrad K.Sangma chuan a thuchhuahah NPP chuan Manipur-a dan leh thupek dinhmun chu an ngai thutak hle tih a sawi a ni.



## ELECTION

Maharstra Assembly inthlan leh Jharkhand Inthlan thawhnhnihna atana campaign chu vawiinah a tawp dawn a. Political Party senior ten hmun tam takah voter te hui tumin campaign an nei a. Naktip Nilaini hian vote thlak a ni ang.

Maharastra-ah hian Assembly seat 288 ah vote thlak a ni dawn a.

(VC)

Chief Minister Eknath Shinde chuan Dhule-a thusawiin Maharastra-a double engine sawrkar chuan kawng tinrengah hmasawna a thlen a ti a. Loneitute bakah khawtlanga mitinte a ngaihven a ni a ti.

Congress hruaitu Priyankagandhi chuan Nagpur-a Mahal area-a kawngzawh huaihawtin Prime Minister Narendra Modia chu 50 per cent reservation ti sang duh loah a puh a ni.

**Jharkhand-ah hian Assembly bial 38 ah vote thlak a ni dawn a.  
Nimin khan BJP President JP Nadda chuan Gomia, Sindri leh Nala ah te hun a  
hmang a. NDA sawrkarin OBC leh tribal hnamte tana hamthatna a siamte a  
tarlang a ni.**

**Hetihlai hian Chief Minister leh JMM hruaitu Hemant Sorena chuan  
nimin vek khan Giridih, Jama leh Jamtara ahte thusawiin BJP chu Bangladesh  
atanga dankalha lo pemitte tanpuiah a puh a ni.  
Inthlan vote tla te hi tun thla ni 23 ah chhiar a ni ang.**

